

**PRIJEDORSKA VLAST** Gradonačelnik bez odgovora

**PAVIĆ:**  
Navodno,  
u velikim  
obavezama

# Prošlost je za Marka Pavića nepotreban teret

Ni nakon petodnevnih pokušaja nije bilo moguće stupiti u kontakt s prvim čovjekom Prijedora

**M**arko Pavić (DNS), gradonačelnik Prijedora, od kojeg smo pet dana pokušavali dobiti barem pet telefonskih minuta za izjavu o inicijativi za podizanje spomenika ubijenoj djeci Prijedora i obilježavanju Međunarodnog dana bijelih traka, bio je, navodno, u tolikoj gužvi kakva nije zabilježena tokom svih godina koliko vlada Prijedorom!?

Barem tako nam je saopćeno, kako od njegovih administrativnih tako i saradnika u vlasti.

## To je sve...

Između ostalog, izdvojiti ćemo dijalog samo s Pavićevom sekretaricom, koja je, nakon što smo i nju ljubazno zamolili za uslugu, preuzela obavezu da „pronađe gradonačelnika“. No, njena potraga je trajala dva

dana iako je s gradonačelnikom dijele samo jedna vrata, međutim, nemam ništa, a kada smo je na kraju opet pozvali, razgovor je tekao ovako:

- Da sam imala nešto povratno za vas, zvala bih, međutim, nemam ništa. Eto, to je sve što imam da kažem.

- Da li ste razgovarali s gospodinom Pavićem?

- Ne... Gradonačelnik je u velikim obavezama, od toga što stevi tražili nemišta.

- Tako je on rekao?

- Ne, to vam ja kažem. Eto, uzeli ste izjave od drugih...

- Da, ali drugi nisu gradonačelnici...?

## Bez termina

- Čujete li šta vam ja kažem, da je bio termin za vas, ja bih vas nazvala. Međutim, nema ništa za vas, on je u velikoj gužvi, tako da stvarno nema vremena.

- Znači, gradonačelnik je

rekao da je u velikoj gužvi i da nema vremena?

- Uzeli ste izjave od ostalih, u velikoj je gužvi stalno, to je sve što ja znam reći...

Tu, tu, tu...

Na kraju smo se, iako bez sekunde razgovora, potpuno razumjeli s gradonačelnikom Pavićem - „vizionarima“ poput njega koji gledaju naprijed „za koplje ispred nas“ prošlost je nepotreban teret.

M. DEDIĆ

Predsjednik Skupštine Grada Prijedora o spomeniku ubijenoj djeci

## Jakupović: Gradonačelnik Pavić prihvatio je da se 'ide u tu priču'

Nadam se da ćemo sve završiti u ovoj godini, tvrdi Jakupović na upit o sjednici na kojoj se treba naći inicijativa za podizanje spomenika ubijenoj djeci Prijedora

Predsjednika Skupštine Grada Prijedora Seada Jakupovića (SDP) bošnjačka udruženja u ovom gradu imaju na zubu zbog, kako ističu, nepotrebnog servilnog odnosa prema gradonačelniku Marku Paviću.

Jakupović se, prema takvim tumačenjima, „pretvorio u zakonodavni fikus i sluša samo Pavićeve instrukcije“. On, međutim, ističe da je jedan od prvih

Bošnjaka koji se sa ženom i tri sina vratio u Prijedor, i to u poratno vrijeme kada je bilo „baš guravo“.

O inicijativi za podizanje spomenika ubijenoj djeci Prijedora ima pozitivno mišljenje, ali naglašava da ne treba žuriti i „uprskati stvar“.

- Gradonačelnik Pavić prihvatio je da se „ide u tu priču“. Ja sam s Draganom Bojanovićem i Daliborom

Grabežom, kao gradska delegacija, bio u Konjicu, gdje je 700-800 metara do centra grada sagrađen spomenik ubijenoj djeci, među kojima su i djeca srpske nacionalnosti. Uradili smo veći broj fotografija i načinili izvještaj - pričam Jakupović.

Prema njemu, sljedeći korak je susret gradonačelnika sa šefovima poslaničkih klubova u Gradskoj skupštini radi upoznavanja i pripre-


manja terena za sjednicu na kojoj bi se kao tačka dnevnog reda našla inicijativa za podizanje spomenika ubijenoj djeci Prijedora.

Na naše pitanje kada će, onda, biti zakazana ta sjednica Skupštine Grada, Jakupović je odgovorio da ga „ne razumijemo, kao ni oni tamo, jer bit će zakazana onog momenta kada se dogovorimo“. Na daljnji upit o tome kada će pasti dogovor - za godinu,

dvije, tri, odgovara:

- Neće toliko. Ovo je osjetljiva materija, ali nadam se da ćemo sve završiti u ovoj godini.

Jakupović je priču o inicijativi za spomenik ubijenoj djeci Prijedora završio riječima da je „nekim bošnjačkim krugovima i udruženjima stalo da ostanu tenzije ili, po onoj narodnoj, što gore - to bolje“. No, odbio ih je imenovati. M.D.



Jakupović: Osjeljiva materija

## Zdravka Karlica, reprezent srpske nacionalne politike u Prijedoru Do prije nekoliko godina 'nije znala' da je ubijeno toliko bošnjačkih civila

Zdravka Karlica reprezent je srpske nacionalne politike i verzije događaja u Prijedoru. Početkom ove godine u Haškom tribunalu je kao svjedokinja odbrane ratnog zločinca Ratka Mladića opisala svoja viđenja događaja u Prijedoru, u kojem je, prema optužnici, 1992. godine počinjen progon nesrpskog stanovništva s razmjerom genocida.

Zoran Karlica, suprug Zdravke Karlice, podlegao je kao oficir Vojske RS od posljedica ranjavanja prilikom zauzimanja Prijedora 1992. godine, a danas jedan od trgovaca grada nosi njegovo ime, nakon što je posmrtno odlikovan. Zdravka Karlica dugogodišnja je predsjednica prijedorske Organizacije zarobljenih i poginulih boraca i nestalih civila RS. Mladićeva odbrana njenim je iskazom željela osporiti optužbe o

udruženom zločinačkom poduhvatu preuzimanja općina i protjerivanja nesrpskog stanovništva, tvrdnjama da je „do sukoba u Prijedoru došlo zbog napada bošnjačkih snaga“.

Interesantno je, ipak, da je Zdravka Karlica imala i sastanke s bošnjačkim organizacijama i udruženjima žrtava, kako bi se krenulo u neke zajedničke projekte. No, u svemu je, prema njenim riječima, nedostajala jedna „sitnica“.

- Željeli smo da bošnjačka strana prizna da su prve prijedorske žrtve bili Srbi - tvrdi Karlica u izjavi za naš list, uz konstataciju da poštuje svaku žrtvu, jer „sve majke jednako plaču“.

Ona tvrdi i da do prije nekoliko godina „nije znala“ da je u Prijedoru ubijeno toliko bošnjačkih civila.

- Kada su na trgu u Prije-



Karlica tokom svjedočenja u Hagu: Supruga Zorana Karlice

doru obilježavali tragediju bošnjačkog naroda, ja sam izašla da se poklonim žrtvama. Nikoga ne štitim ko je uradio zločin, ali ne mogu da vjerujem da je neko iz mog naroda to uradio - ističe Zdravka Karlica, ostajući nedorečena u odgovoru na pita-

nje ko je onda počinio tolike zločine u Prijedoru.

Na pitanje treba li u Prijedoru podići spomenik ubijenoj djeci, odgovara da „svaka žrtva zaslužuje obilježje“. Predsjednica Organizacije zarobljenih i poginulih boraca i nestalih civila Prijedor ne krije ni da ju je šokiralo otkriće masovne grobnice Tomašica s ogromnim brojem bošnjačkih žrtava.

- Strašno je to za mene, ne mogu vam to ni ispričati. Porazno je to. Ali, još nešto je gore, a to je da se još 2004. godine znalo za Tomašicu, jer tada su počele ekshumacije - objašnjava Karlica.

Na pitanje da pojasni, odgovorila je da je 2004. godine Jasmin Odošić, bivši načelnik Komisije za traženje nestalih FBiH, ekshumirao 49 tijela, ali onda mu je „neko naredio da prestane“.

M. DEDIĆ

## 39 sudskih presuda jasno je sve reklo

Mirsad Duratović, predsjednik Udruženja logoraša „Prijedor 1992“, podsjeća da nema ništa nepoznato o početku rata u Prijedoru i počinjenim zločinima. Naprotiv, kaže da je sve kristalno jasno i potvrđeno meritornim pravnim sredstvima.

- U 39 sudskih presuda za ratne zločine počinjene u Prijedoru koje su donesene u sudovima od Haga preko Sarajeva, Banje Luke do Beograda, utvrđeno je kada je i kako sve počelo u Prijedoru. Problem je što lokalne vlasti

i nevladine organizacije sa srpskim predznakom u Prijedoru ne priznaju sudski utvrđene činjenice, već pokušavaju ispisati neku novu, „pristojniju“ historiju Prijedora. Takva bi historija ispislala „činjenice“ po kojima će svi biti krivi, samo oni ne - kaže Duratović u svojoj reakciji na tvrdnje Zdravke Karlice.

Mirsad Duratović iz sela Bišćani kod Prijedora 20. jula prošle godine, na kolektivnoj dženazi u Prijedoru, ispratio je posmrtnu ostatke deset članova svoje najbliže porodice od ukupno 47 Duratovića ubijenih u julu 1992. Duratović je ukopao oca Mehmeda, brata Halida koji je ubijen sa 15 godina, djeda Husniju, nanu Đulu, amidžu Ismeta sa sinovima Elvisom i Enesom, amidžu Ešefa sa suprugom Zemirom i amidžu Hazima. Svi su ekshumirani iz Tomašice, najveće masovne grobnice na tlu Evrope nakon Drugog svjetskog rata.



Duratović kraj masovne grobnice Tomašica